

欽定剿平粵匪方略

欽定勦平粵匪方略卷四百九 乙丑年

八月初七日 己亥 瑞麟郭嵩燾奏言花旗股匪自

平遠被勦潰走江西長甯復被江軍截擊回竄
龍長交界之雉雞籠鐵場等處當飭總兵卓興
副將鄭紹忠戴朝佐等移營進勦六月二十日
鐵場踞匪竄至長樂縣屬之羅鹿凹經官軍截
勦斃匪甚衆賊遁回鐵場七月初一日戴朝佐

會同各營出隊進攻奮力夾擊賊衆敗潰我軍
乘勝追殺將鐵場鯉魚嶺竹園圍漥坑逆巢一
律掃平賊盡回雉雞籠屯聚初二日鄭紹忠卓
興兩軍合攻雉雞籠均獲勝仗該逆分竄長樂
縣境現飭跟蹤追剿凍逆汪海洋被我軍擊退
後疊犯武平巖前一帶閩軍屢剿獲勝逆匪仍
回鎮平霆營叛卒竄慈溪鄉高田等處恃凍逆

爲援近獲奸細供稱濂逆有由嘉應出竄之意
李福泰派都司鄧安邦等軍扼守要隘方耀與
道員康國器進紮新鋪及高思地方逼近鎮城
約同進取六月二十一日僞天將譚富率衆千
餘人赴大營投誠薙髮繳械李福泰挑選精銳
八百名留營效用餘俱分別遣散查濂逆各股
匪兇狡異常花旗逸入長甯原欲爲逆衆先導

遂其全股竄江之志迫被勦折回潛伏龍川邊
境實踞嘉應大兵之後牽綴我軍不能兼顧儻
勦辦日迫則與濂逆由連和同走南雄信豐勢
將再擾江楚臣等飛調副將朱國雄參將梁瓊
兩軍自南雄移紮連和以扼竄江要路同知曾
紀鳳添募楚勇一千馳赴南雄會同總兵任星
元全隊擇險固守戴朝佐駐兵岐嶺以防賊入

永安兼顧惠州並飭卓興鄭紹忠等併力合剿
花旗先將此股撲滅以孤濠逆之勢惟東路勁
旅祇有卓興方耀鄭紹忠三軍卓鄭兩軍會剿
花旗股匪已形單薄方耀一軍專顧嘉應兵力
尤單臣等仍當嚴飭方耀會商康國器等節節
偪緊相機圖克鎮平一面移催提臣高連陞速
紮平遠以資聯絡至譚富自拔來歸應請准其

更名譚德恩隨營效力仍察看能否立功再行
分別辦理奏入

上命軍機大臣傳諭瑞麟左宗棠徐宗幹劉坤一郭
嵩燾孫長紱曰花旗股匪被江西截擊回竄龍川
等處經瑞麟等飭卓興等移營進剿斃賊多名現
令該將弁跟蹤追剿所辦尙合機宜惟滇逆在鎮
平與霆營叛卒互相援應並有由嘉應出竄之意

設與花旗合股同竄南雄信豐勢必再擾江楚瑞
麟等雖派副將朱國雄等移紮連和並添募楚勇
馳赴南雄扼守而進偪鎮平祇有方耀康國器兩
軍尙形單薄高連陞等軍何以日久未到著左宗
棠等嚴飭速赴粵省會同進剿以期速復鎮平前
諭孫長紱飭令席寶田等軍越境會剿劉坤一計
程當抵新任著迅催贛州防軍入粵以厚兵力花

旗勦敗之餘易於殄滅著瑞麟等嚴飭卓興等軍
奮勉攻勦不得稍涉鬆懈僞天將譚當自拔來歸
著准其更名隨營效力儘能殺賊立功著瑞麟等
奏請獎敘

十三日乙巳孫長紱奏言據報廣東龍川縣之賊

僞天將林政揚於七月初九日率大股竄往長
樂翟逆一股尙踞龍川興甯交界地面潰逆注

海洋近日亦由鎮平移糧至東石地方等情該處路通嘉應平遠似有他竄之意該逆自踞鎮平與粵師抗持累月而林翼兩逆分擾長樂龍川滋蔓漸廣江閩邊防殊無了日宜合三省兵力速行掃蕩惟越境會剿必須大隊勁旅方能得力臣現今提督婁雲慶之霆字營臬司席寶田之精毅營共籌援粵惟霆營原駐鐵石墟現

又分隊進紮鵝公墟兼防龍川逆匪竄江之路
精毅營原駐澄江墟現又分隊進紮珠村墟兼
防鎮平逆匪竄江之路今均調派出境邊防頓
覺空虛兵力甚單此外無可調派填紮惟有諄
囑婁雲慶席寶田與閩粵各軍定期進取步步
爲營以勦爲堵力杜該逆繞越江境至會合三
省兵力進剿殘寇主客各軍營數旣多職分又

各不相下指揮調度未必相符亟須威望素著
之大員駐軍督勦方足嚴號令而一事權合無
仰懇

天恩特派重臣進駐粵境節制三省官軍督率攻勦
以期將士用命迅掃賊氛奏入

上命軍機大臣傳諭左宗棠瑞麟劉坤一郭嵩燾孫
長紱曰據孫長紱奏稱林逆竄往長樂翟逆尙踞

龍川興甯交界地面濊逆由鎮平移糧東石地方
似有他竄之意現飭令婁雲慶等會籌援剿而兵
力甚單且須兼顧江境惟有步步爲營以剿爲堵
請特派重臣進駐粵境督剿等語濊逆一日不除
粵境一日不靖江閩邊防迄無了期自應合三省
兵力迅圖殄滅第主客各軍營數旣多職分又各
不相下且該將領進止機宜須俟各該省督撫指

揮調度勢必遷延觀望坐失事機左宗棠廓清浙
閩威望素著著卽督率高連陞等軍馳赴粵境調
遣三省之軍合力攻剿所有江西廣東援剿各軍
均著歸左宗棠節制以一事權務將鎮平踞匪剋
日殲除林翟諸逆次第掃蕩俾粵省一律肅清汪
海洋以殘敗餘孽竄踞鎮平粵軍進攻數月迄未
得手殊屬疲玩著瑞麟等嚴飭李福泰方耀等認

眞攻勦迅拔堅城如敢再事因循卽著左宗棠從
嚴叅辦劉坤一計期應已抵任著恪遵前旨檄飭
江境防軍入粵會勦聽候左宗棠調遣以期迅速
戴功

十五日丁未左宗棠徐宗幹奏言康國器一軍在

嘉應嵩山擊賊獲勝後六月初九日汪逆遣黨
五六百人於棠梅亭地方築卡冀阻官軍進攻

之路康國器卽飭吳光亮等乘夜進攻施放火
器斃賊百餘名餘匪遁回鎮平二十七日康國
器親督各營由高思前進七月初二日飭羅洪
標等各率所部進紮距鎮平二十里之程官埠
初六日康熊飛林本羅洪標等分三路進攻石
坑排藍坊南坑頭各賊壘均破之賊匪棄械狂
竄共斃賊一千數百名初八日康國器復督各

營分路進勦康熙飛等行抵南坑頭逆首胡瞎
子率悍黨三萬餘結陣抗拒康熙飛等督勇奮
擊關鎮邦等繼之逆首胡瞎子被創遁走爲兵
勇所殺官軍追至距鎮平南門八里始行收隊
是役共斃賊二千餘名查汪海洋竄伏鎮平該
處居粵閩深山之中巖谷幽險掠食維艱勢難
久踞現在康國器關鎮邦兩軍攻其東南距鎮

平縣城不過二十里高連陞黃少春劉清亮分
紮武平邊境在鎮平之北距鎮平縣城亦祇四
十餘里又飭張恆祥率所部由上杭赴巖前替
出高連陞軍回紮中赤以助下壩之防王德榜
率所部由上杭趨象洞劉清亮率所部移紮盤
龍岡劉典赴援江西之軍暫行移紮濯田以助
武平現在鎮平東南及東面北面閩軍已互相

聯絡長圍蹙賊之勢已成惟西路西南路可通
興甯長樂龍川其地距閩較遠必須粵軍自爲
截勦非閩軍所能代謀據李福泰函稱花旗各
賊竄擾龍川現催卓興先將花旗撲滅而後集
龍長之師全力以攻鎮平若如所擬則鎮平西
路西南路竄蹤盡斷不難剋期勦除

左宗棠又奏言查老湘營自咸豐十年隨

臣勦

賊陸續增至三千餘人歸總兵王開琳管帶復經江西撫臣沈葆楨增募勇丁四千名編爲新湘九營餉由江西籌給營官哨長均由老營分撥併歸王開琳統帶四月二十二日進剿永定獵射凹之賊新湘六營老湘兩營俱陷宿將丁長勝死之究其致敗之由實因米糧匱乏軍士飢疲所致臣當飭解月餉令王開琳加意整理

拔赴贛州以助江西之防王開琳抵贛後稟稱
老湘左營忽有索餉聚鬧情事並稱積欠口糧
甚多臣查老湘營自成軍以來舊餉止欠發銀
八萬六千餘兩新餉止欠發銀二萬四千餘兩
臣因閩餉罄竭諭各軍以浙省月協閩餉十四
萬兩新餉可源源而來其舊餉均截至同治三
年底止暫緩清給各軍知新餉旋來舊餉有著

並無異詞何以老湘一軍忽敢譟索並稱積欠甚多旋查新湘各營月餉須二萬三四千兩入閩以來江省每月多則僅解銀七千兩少則僅解銀五六千兩較之老湘短絀懸殊王開琳因新勇立形飢潰不得不於老勇浙餉內挪墊勻給而老勇以分所應得之浙餉爲新勇所分心懷不服譟索隨之臣宗棠當卽嚴飭清釐旋據

王開琳稟斬其倡首者六人而事已定已由贛
州前赴安遠扼紮未聞有他大約江西續發新
湘之餉其事始息也惟是課索之端一開士氣
已囂然不靖如江西之餉必課索而後可得則
各軍難免效尤霆營叛勇何嘗非有功江西之
人祇因積欠過多有所藉口遂致決裂厥後婁
雲慶一軍入閩數月僅得餉二萬兩並向領食

米亦概不發給迨軍中大譁擁至贛州江西始發餉銀七萬兩是士卒飢譟之由皆因餉項不能勻給不得不據實瀝陳奏入

上命軍機大臣傳諭左宗棠瑞麟徐宗幹劉坤一郭嵩燾孫長紱曰汪逆竄伏鎮平疊經閩粵各軍圍逼勢孤力竭斷難久踞惟窮極思竄自在意中現在康國器關鎮邦兩軍攻其東南距鎮城僅十餘

里高連陞黃少春等軍分布鎮城之北皆相距數
十里是東南北三面已成長圍之勢惟鎮平西路
西南路可通興甯長樂龍川閩軍尙難兼顧白係
實在情形本月十三日已有旨令左宗棠馳赴粵
境調遣三省之兵合力攻剿卽著左宗棠剋期進
紮將江粵各軍應如何布置務臻周密之處相機
妥辦迅奏膚公左宗棠起程後閩省邊防事宜徐

宗幹當隨時咨商左宗棠認真籌辦卓興一軍勦
辦花旗股匪情形若何著瑞麟郭嵩燾嚴飭實力
進剿迅圖撲滅以便騰出兵力合攻鎮平毋得曠
日持久顧此失彼劉坤一孫長紱當恪遵疊次諭
旨檄令江省防軍進紮粵境合力圍攻鎮平以竟
全功左宗棠奏王開琳等所部各營餉絀爭鬭情
形江省於該軍應發之餉何以任意遲延直至該

營滋鬧始行發給孫長紱於此事辦理實屬不善
嗣後新老湘營及婁雲慶所部各營餉銀著劉坤
一等源源撥解毋令缺乏

二十一日 癸丑 郭嵩燾奏言 臣 渥邀

恩命權撫粵東蚤作夜思原期補救萬一無如年來
疾病侵尋漸至增劇伏念粵東尙屬有爲之地
巡撫又兼得爲之權 臣 以疾病餘生深恐貽誤

地方惟有仰懇

天恩准予開缺

特簡賢員巡撫粵東實於地方有裨

郭嵩燾又奏言廣東軍務約有數誤本年五月賊勢沿潮州北竄由武平以趨鎮平其時郭松林楊鼎勳兩軍駐紮雲霄屢與臣約由閩赴粵而鎮平失守二十餘日李福泰並未稟報迨臣

得楊鼎勳函始商之兼署督臣瑞麟委員運糧
往迎已由左宗棠奏飭回蘇坐令窮賊入粵不
得大支勁旅勦辦此一誤也馮子材自江南回
粵臣與接談軍務具有條理其將弁若楊武賢
關松志楊青山湛恩榮大率樸幹椎魯深堪倚
恃曾言於前督臣毛鴻賓以李福泰本非知兵
又素性慈柔過於粉飾宜令馮子材接辦東江

軍務毛鴻賓具奏後又將卓興調赴東江改奏
馮子材辦理羅定股匪迫羅定事竣霆營叛卒
適倡樂昌臣又屢商瑞麟飭馮子材督辦均未
允從用兵至四萬餘僅恃李福泰輾轉周旋不
諳調度此又一誤也湘淮各軍由曾國藩定立
營制以五百人爲一營整齊約束粵民强悍甚
於湘淮而自來募勇章程極爲廢弛臣前與毛

鴻賓商定營制仍以五百人爲一營乃方耀始
留三千人爲六營漸增至九千餘人鄭紹忠五
百人爲一營漸增至五千人迄未依照辦理方
耀防堵平遠數月聞賊至而先避全軍潰散鎮
平賊退鄭紹忠跟蹤收復數日而賊返撲至損
銳氣卓興住省兩月索舊欠二十萬以行由老
隆調赴興甯徑報率勇歸家已而復稱各勇均

經招回瑞麟概不查問此又一誤也查粵東軍
務未嘗講求實際從前額餉之外動懸賞號數
萬浪費營私不知所紀近年用兵至四五萬人
餉需稍缺卽驕蹇不服調度加以幕客門丁書
吏扶同罔利惟懼事權旁假聳弄督臣防臣干
預前因長樂失守惠州戒嚴經司道等會商請
臣駐紮惠州藉資鎮壓乃督臣面斥司道責臣

越職侵權臣以惠州爲省垣屏蔽瑞麟兼任將軍職在居守臣躬親禦賊仍請瑞麟具奏似非越職而以此大觸忌諱遂至宣言於衆謂撫臣欲加整頓一叅卓興而卓興反一叅方耀而方耀反此二人憾撫臣方深一出省且舉兵圍之索餉臣於卓興方耀惟公事交涉稍加勸誡瑞麟專與交歡一時負氣昌言於衆萬一興亂咎

將誰歸臣查瑞麟慈柔寬裕狃於見好如去年
九月旗營因積欠譚課立時籌放數千金本年
五月譚課又籌放數千金始終不懲儆一人以
粵東獷悍之區人心浮動之日又當軍務繁興
庫儲空乏竊憂其難以持久如臣愚弱因循徒
滋怨謗實無可爲自效之術非有剛強嚴毅之
員接任巡撫幫同瑞麟經理恐隱憂日深不可

收拾仍乞

嚴飭瑞麟先將該署幕友徐灝攢退稍清其流無任
盤踞把持敗壞風氣實於粵東大局有裨奏入
上命軍機大臣傳諭左宗棠曰郭嵩燾與瑞麟意見
不合致多掣肘何妨據實陳奏乃竟稱疾乞退殊
失和衷之道其所陳廣東軍務致誤之由如李福
泰粉飾軍情鎮平失守二十餘日李福泰並未稟

報方耀防堵平遠數月間賊至而先期避去致令
全軍潰散卓興駐省兩月索餉二十萬由老隆調
赴興甯徑報率勇歸家已而復稱各勇均經招回
瑞麟概不查問長樂失守惠州戒嚴郭嵩燾欲駐
紮惠州瑞麟將會商之司道面斥且對衆宣言巡
撫欲加整頓卓興方耀將反如果實有其事實屬
有意掣肘幕友徐灝係屬何人郭嵩燾但請撥退

而未明言其如何盤踞把持敗壞風氣前有旨諭
令左宗棠馳赴鎮平督辦軍務將廣東江西福建
三省兵勇節制調遣刻下諒已接奉此旨卽著就
近將郭嵩燾所叅各節確切訪查該署督撫因何
不協究竟爲公爲私據實覆奏請旨遵行粵省軍
務方殷若疆臣各存意見將士復粉飾軍情不肯
盡力大局何堪設想左宗棠秉心公正諒不肯稍

涉偏徇代人受過本日孫長紱奏婁席兩軍現議
取道赴粵並探聞李侍賢爲汪逆刺斃兼殺其舊
黨僞王宗天將等五人現在李逆舊黨猜忌益甚
機有可乘等語已諭劉坤一等飭派出各軍合力
圍剿左宗棠當懷遵疊次諭旨迅速赴粵將江西
閩粵各軍妥爲調度以期早日竣事李逆是否被
殺並著查明具奏

同日孫長紱奏言據婁雲慶咨稱逆首汪海洋
盤踞鎮平伺隙思逞婁雲慶已親率馬步各營
赴定南長甯交界之鵝公墟並會商席寶田率
軍由澄江墟出粵東平遠縣之東石婁雲慶率
霆字營由長甯八尺墟山平遠縣之大柘分路
並進聯絡閩省武平防師爲合力圍逼之計兼
截逆匪圖竄江省會昌瑞金之路並擬令周寬

世統銓字營進扼篁鄉堡王開琳統新老湘營
移守鵝公墟以固長甯安遠藩籬惟定南一口
與粵之和平龍川興甯等縣毗連須防長樂股
匪乘虛竄入擬將防守南安之祥字營移扼定
南另撥一軍填紮南安又據吉南賴甯道王文
瑞稟稱侍逆李侍賢自永定潰後薙髮逃至鎮
平黃坑地方爲叛勇所獲疑係官軍探卒送至

偽天將黃添元館內李侍賢當以實告黃添元
卽報知汪海洋迎往鎮平其初相待甚優嗣李
侍賢舊夥各頭目聞李逆至紛紛往見李逆復
屢次索還舊黨汪逆不許始懷疑忌李逆與舊
黨以汪逆不肯分兵必懷不善又畏其很鷙密
謀刺害爲汪逆所覺於七月初三夜閒飭令心
腹將李逆刺斃並殺其舊黨偽王宗天將朝將

五人復將李黨分隸各館猜防益甚等情臣查
侍逆李侍賢流毒數省罪難擢髮永定之役竟
被漏網今爲汪逆所殺從此除一兇渠其舊黨
遂與汪逆互相猜嫌機有可乘應易奏功婁雲
慶與席寶田議定分道並進堪以兼顧會瑞邊
防臣現咨湖南提督周寬世已革總兵王開琳
各率所部剋日分路前進惟所稱以防守南安

之祥字營移防定南查南安地處江粵咽喉亦
爲粵逆竄楚要道臣現與湖南撫臣函商另撥
一軍填紮南安卽令祥字營馳駐定南庶後路
悉臻周密奏入

上命軍機大臣傳諭劉坤一孫長紱曰滋事汪海洋
久踞鎮平伺隙圖逞近因侍逆李侍賢窮蹙往投
索還舊黨互相猜忌汪海洋於七月初三夜間將

李逆殺斃其黨與多懷疑貳機事大有可乘亟應
撥調重兵合力兜剿前已諭令左宗棠督率高連
陞等軍馳赴粵境督剿江廣援軍均歸節制現在
席寶田所部精捷營議由澄江墟出平遠縣之東
石婁雲慶所部霆字營議由長甯八尺墟出平遠
縣之大柘分道並進會合閩省防師實力圍偏兼
截該匪圖竄江省會昌瑞金之路卽著劉坤一孫

長紱飛檄該兩軍迅卽取道入粵歸左宗棠調度
相機合剿孫長紱現咨行周寬世進扼篁鄉堡王
開琳移守鵝公墟以固長甯安遠藩籬並防守定
南南安著照所議會籌妥辦劉坤一計已抵任著
卽將邊境防守情形隨時確查具奏

二十三日 乙卯 左宗棠徐宗幹奏言康國器一軍

進駐鎮平將石排坑等處賊壘掃蕩後七月十

三日汪海洋復率悍黨二萬餘分路直撲程官
埠營壘營官林木等督隊猛戰殺賊二百餘名
康國器復飭康熊飛等各率兵勇橫截又斃悍
賊五百餘名擒斬僞神將朱三元等多名賊遂
敗竄十四日汪逆復糾逆黨萬餘來犯康國器
料賊詭謀必虛攻程官埠待高思各軍出援卽
圖襲我後路當飭林木等率軍往程官埠助剿

一面飭康熊飛等嚴守營壘挑選銳卒伏於石
灰岡烏泥嶺兩山之閒伺賊竄入擊之汪逆果
嗾胡瞎子何明亮等率衆撲程官埠營壘林本
等俟賊撲近排槍轟擊斃賊甚多汪逆令胡瞎
子等牽掣程官埠各營親率僞奉王黃十四僞
王宗汪大力等二萬餘人徑撲高思官軍營壘
康熊飛率隊佯退誘賊入伏吳光亮等從山坳

突出伏兵盡起僞王宗汪大力中槍立斃僞奉
王黃十四擊傷右髀墜馬落澗而遁官軍縱擊
陣斃僞衆護汪得勝等悍賊六百餘名賊敗退
山巔汪逆勒令諸賊拌死回關康熊飛吳光亮
等各率所部前後夾擊槍傷汪逆左腕羣逆急
昇之走賊隊大亂立斃悍賊四百餘名吳光亮
等分路抄截賊墮巖落澗死者不下數千林木

等同時將胡瞎子何明亮兩逆擊敗斬賊四百
餘名汪海洋胡瞎子等遁回鎮平共陣斃悍賊
二千餘名是日張恆祥亦率隊至分水坳一帶
察看地勢遇賊數百擊走查竄粵餘逆惟汪海
洋一股兇狡最著此次經康國器督軍勦敗殲
斃悍賊甚多兇燄頓衰據獲賊供鎮平之賊久
思由武平竄江西因汪逆新被重創一時猝難

遠竄現在劉典所派總兵劉明燈等已抵武平
臣等卽飭高連陞黃少春兩軍由巖前中赤進
駐廣福鄉以攻鎮平之北劉典所部填紮下壩
盤龍岡爲各軍聲援兼顧江西其王德榜一軍
由上杭象洞前進與高連陞黃少春康國器各
軍互相聯絡粵軍如能嚴扼鎮平西南不任賊
蹤紛竄閩浙各軍由鎮平東路北路東南路節

節偏勦自可漸合長圍以期聚殲頃據廣東藩
司李福泰稟報長樂縣城又被花旗賊匪竄陷
現催卓興鄭紹忠等軍往勦是該藩司前議先
將花旗撲滅再行會規鎮平旣勢有未能閩軍
亦迫不及待而方耀鄧安邦兩軍現雖駐鎮平
之南能否力扼西南尙未可知此次康國器一
軍勦賊出力弁勇可否由臣等查明擇尤請

旨獎勵陣亡之擬保守備把總區昌應請

飭部照守備陣亡例議卹

同日瑞麟郭嵩燾奏言花旗全股匪聚雒雞籠
總兵卓興參將戴朝佐同紮鐵場副將鄭紹忠
駐紮十二排黃花口約期合攻七月初五初七
初八等日疊次進剿均有斬擒初九日該逆繞
道突撲長樂縣城知縣粟資源督同文武兵團

登陴守禦開礮轟斃悍賊數名逆勢稍卻忽後
股踵至冒死圍攻守城兵力不支是日酉刻被
匪闖入縣城粟資源督勇巷戰身受叢傷不知
下落戴朝佐中途聞報卽派都司黃添元等兩
營赴援因山路泥濘難行比黃昏抵縣而城已
先陷卓興親督全軍由青溪渡河十三日抵長
樂之五里亭該逆大隊出城迎敵我軍分路進

勦斃匪千餘名是日鄭紹忠由隔河繞出塔岡以攻其東南前隊劉順昌等從水西壩過河該匪一股於南路三里之高排坊迎敵一股從南門湧出我軍兩路夾攻將高排坊之匪首尾截斷殺賊五十餘人埽除賊營五座各匪仍抵死不退兵勇奮力衝殺又斃匪百餘名賊由南門敗入城內十四十五十六等日官軍偪城環攻

賊閉門不出花旗股匪之竄擾龍川也與濂逆
暗約牽綴官軍使前後不能兼顧是以七月初
五日卓興合勦雉雞籠濂逆卽於是日率黨五
六千人赴黃沙坑山嶺築營爲掩襲我營之計
總兵方耀於初六日率軍直抵黃沙坑潛登山
巔壓賊壘而陣該逆不料我軍猝至蒼黃出拒
我軍槍礮齊施斬馘數百名生擒僞天將黃培

陞等二十二名賊由山北遁入鎮平十三日方
耀親督大隊進擊斃匪甚夥十七日賊由鎮平
擁衆數萬會齊三圳墟之匪欲搭浮橋過河以
犯我營方耀督勇出戰遇賊於鴨麻渡口我軍
分隊迎擊槍斃悍匪多名賊始遁回三圳墟連
日閩軍康國器亦屢獲勝仗查濂逆與花旗股
匪狼狽爲奸以長樂處惠州嘉應之中爲餉道

所經攻我所必顧期分兵力故濂逆同時蠢動
思與花旗遙相呼應進可擾粵退可竄江其謀
甚狡自卓興等圍攻長樂而賊已入諸陷阱果
從此先將花旗殄滅可絕惠郡腹心之患惟惠
州爲省會藩籬永安毗連長樂又爲惠州門戶
臣等現飭卓興等剋期先復長樂方可移軍赴
嘉以全力規取鎮邑復飭衛佐邦速赴惠郡布

置防堵事宜朱國雄梁瓊兩軍馳抵永安以扼
東江要隘鄧安邦一軍移紮興甯以剿竄匪仍
飭方耀會商閩軍康國器等設法進取以杜濫
逆旁竄至黃添元鄧奮鵬馳援長樂輒因溪漲
路阻未克迅速赴援以致縣城被陷實屬咎無
可辭應請

旨將都司黃添元鄧奮鵬卽行革職仍隨營效力以

觀後效長樂文武下落容俟查明分別辦理均
奏入

上命軍機大臣傳諭左宗棠瑞麟徐宗幹劉坤一郭
嵩勳孫長紱曰竄粵餘逆惟汪海洋一股兇狡最
著此次經康國器督軍痛剿殲斃悍賊甚多汪逆
身受重創一時猝難遠竄自應以剿爲防步步圍
逼方能聚而殲旃左宗棠現飭高連陞等進逼鎮

平之北令劉典王德榜等分屯要隘聯絡聲援惟
鎮平西南一路必須粵軍嚴扼其衝而花旗股匪
竄陷長樂卓興等軍爲所牽綴僅餘方耀邵安邦
兩軍恐不足以遏賊奔突著瑞麟郭嵩燾督飭方
耀等實力扼守一面嚴飭卓興等將長樂縣城迅
圖攻克殄滅花旗一股庶得早日合兵殲除汪逆
席寶田婁雲慶等軍前已有旨令其馳赴鎮平左

宗棠督辦軍務廣東福建江西三省兵勇均歸節制著懷遵前旨迅速前進妥籌一切如有不遵調遣及遲玩軍務者並著查明叅奏康國器一軍越境勦賊以寡勝衆准由左宗棠等查明出力員弁擇尤保奏陣亡之把總區昌著照守備陣亡例議卹長樂文武下落著瑞麟等查明具奏都司黃添元鄧奮鵬馳援長樂輒因溪漲路阻未克迅速赴

援以致被匪攻陷實屬咎無可辭均著卽行革職
仍令隨營效力贖罪

二十八日庚申大學士湖廣總督官文湖北巡撫

鄭敦謹奏旨欽奉

諭旨飭將鮑超一軍餉項設法接濟該提督已於八
月初二日到鄂適接江西撫臣咨稱霆營潰勇
自竄至龍川地方與髮逆先合後分遂赴大柘

向粵軍乞降行至嘉應仍不肯就撫還屯鎮平
平遠長樂與濂逆汪海洋互相犄角其戡軍之
留上杭者雖經叟雲慶設法拊循然亦須該提
督親往料理方可復成勁旅是江粵軍情正在
喫緊自應促其趕募四營馳赴江西辦理江粵
軍務所需軍火等項卽由鄂省酌給其應支月
餉並飭糧臺籌給兩月全餉以利遄征將來飽

超抵江後該軍月餉卽由江西就近籌撥奏入
上命軍機大臣傳諭官文左宗棠劉坤一鄭敦謹鮑
超孫長紱曰官文等奏提督鮑超現已抵鄂募勇
赴江助剿前次霆軍叛勇已與汪逆勾合抗拒官
兵其婁雲慶所帶部勇前亦因索餉譁謄必須鮑
超親往整頓方可復成勁旅著傳諭該提督趕緊
四營馳赴江粵邊境聽候左宗棠調遣汪逆身受

重傷困守鎮平鮑超打仗素能得力左宗棠得此
生力一軍會督閩粵諸將鼓勇前進諒不難剋日
殲除鮑超一軍應支月餉現已由湖北籌給兩月
以利遄征該提督抵江後卽著劉坤一孫長紱就
近籌撥毋令缺乏

欽定勦平粵匪方略卷四百十 乙丑年

九月初二日 甲子 瑞麟郭嵩燾奏言花旗

入長樂縣城各軍合力圍攻該匪閉城不出七月十七日總兵卓興督率親軍移紮城北該逆率黨三千餘人蠭擁來犯卓興與都司莫華喜等帶勇前後夾攻斃匪多名是夜卓興派莫華喜在附城山嶺潛築礮樓悍賊千餘復行出撲

莫華喜督勇放槍轟擊卓興繞出賊後奮攻賊衆駭潰十八日卓興復令守備林進陞於城北山上添築礮樓一座用炸礮轟入城內斃賊不少二十五日該逆大隊從東門擁出掩襲官軍營盤副將鄭紹忠等奮力衝擊殺賊數十名賊趨東門遁去是夜僞列王黃棕保遣人赴鄭紹忠營前投誠鄭紹忠飭令立功自效二十七日

陡聞城內殺聲鼎沸我軍嚴列以待黃棕保率其黨二百餘人從南門奔出各匪從後跟追鄭紹忠以檣槍隊接應黃棕保到營薙髮繳械卓興飭交鄭紹忠安插是夜卓興設伏東門外分隊佯攻逆匪礮臺該逆驟開東門赴援伏兵突起殺賊無算生擒僞列王洪桂芳一名卓興料匪已膽寒乘夜約鄭紹忠等同時進攻將礮臺

內屯匪千餘人聚殲無遺賊閉門拒守我軍愈
攻愈猛僞天將林政揚等縋城乞降將首先倡
亂之僞來王陸瞬得綑縛送出並殺來逆親隨
死黨百餘名三十至八月初一等日逆衆全行
薙髮繳械當卽酌選精銳充當頭敵擬帶赴鎮
平勦辦濊逆餘衆遣散立將縣城收復惟汪海
洋屯聚鎮平久思狂竄方耀一軍較單未能深

八幸花旗已經勦滅尙餘零星小股散漫於興甯龍川交界之赤岡等處祇須酌留一軍勦撫兼施或不難於蒞事現飭卓興鄭紹忠等卽日移紮鎮平會同方耀及康國器等合力勦辦以清餘孽再將總兵曾敏行一軍調紮南雄參將朱國雄遊擊梁瓊兩營移赴連和一帶擇要扼守江西邊境所獲來逆陸瞬得列逆洪桂芳均

令解省審辦以正典刑總兵卓興擒獲首逆招
撫花旗全股收復縣城尙屬出力應如何量子
獎勵出自

天恩其餘在事出力人員容臣等查明擇尤保奏署
長樂縣知縣粟資源失守後隨同卓興等恢復
城池可否免其治罪革職留營效力以觀後效
林政揚等擒獻首逆率衆出降尙知自新應請

准其改名林英彪給予守備銜仍令充當前敵
立功報效奏入

上命軍機大臣傳諭左宗棠瑞麟徐宗幹劉坤一郭
嵩燾孫長紱曰花旗股匪闖入長樂經卓興等設
法圍攻僞列王黃棕保額請投誠僞天將林政揚
等縋城乞降將僞來王陸瞬得綑縛送出並殺來
逆親黨百餘名當將長樂縣城收復卓興等現於

降人中酌選精銳率赴鎮平勦辦凍逆著瑞麟郭
嵩燾飭令卓興等嚴密防維妥爲駕馭不可稍涉
大意致爲該降人所紿汪海洋屯踞鎮平兇燄日
衰現在卓興鄭紹忠等軍已移紮該處是鎮平西
南面已有粵軍兜圍著左宗棠檄飭閩粵江西各
軍協力進攻務將此股迅速殄除瑞麟等現調會
敏行一軍駐紮南雄派朱國雄等兩營移赴連和

一帶卽著飭令該員等扼要嚴防毋令逆匪蔓延及江境劉坤一孫長紱卽飭席寶田婁雲慶等懷遵前旨迅速前進聽候左宗棠調遣

上諭內閣曰花旗匪黨乞降收復長樂縣城勦辦尙爲迅速總兵卓興著以提督儘先提奏其餘在事出力人員著瑞麟郭嵩燾擇尤保奏署長樂縣知縣粟資源被匪闖入縣城本有應得之咎惟該員

於失守後隨同卓興等克復城池著免其治罪仍革職留營效力以觀後效降人林政揚著准其改名林英彪並賞給守備銜以爲自拔來歸者勸

初六日

戊辰

左宗棠徐宗幹奏冒汪海洋伏匿鎮

平時遣賊黨至分水坳一帶窺犯閩邊希由武平以竄江西副將張福齊等已抵武平進紮下壩嚴防後路高連陞黃少春等進紮鎮平北路

廣福鄉羅岡等處賊於縣城東北路亭下修築
堅壘外開長濠踞險固守八月初一日高連陞
督兵分路進剿該逆突出數千人拚死來撲副
將曹光德等督隊馳擊斃賊甚多適黃少春率
親兵馳至賊仍退入卡內初二日汪逆親率悍
黨數萬分三路直撲分水坳新壘高連陞督飭
官軍奮勇衝擊該逆紛紛敗走我軍乘勢掩殺

汪逆復率同祐逆李遠繼等分左右兩路翻山而下將抄出分水坳各營之後高連陞飭曹光德等分隊迎擊賊匪退聚山巔李大有立斃悍賊多名李士順在右路迎敵先已將賊擊敗旋因中路之賊漸趨右路愈聚愈多李士順衝入賊中勢幾不支適黃少春督隊繼進祐逆李遠繼復偪諸賊回撲劉甫田大呼陷陣劉端冕等

各下馬奮擊血戰而前賊衆披靡奪路狂竄官
軍追過山坡高連陞等復截殺無算汪逆見兩
路之賊俱敗逃回鎮平我軍追殺數里統計殺
斃悍賊三千餘名生擒百數十名內有僞天將
等賊目十餘名其自相蹂躪墮崖落澗死者不
下數千名康國器一軍於七月三十日進攻鎮
平城東南九曲炭腳石古排賊壘逆首胡瞎子

率黨分三路來援康熊飛等分投迎敵鏖戰逾時斃先鋒悍賊二十餘名賊衆翻山逃遁官軍轉戰而前斃賊無數追抵石古排賊壘濠邊僞天將張詳瞬周建榜及賊目楊潰雲李拮寬盧東芳等率黨千餘赴康國器營乞降康國器受之分別挑留遣散查汪逆經官軍疊次剿敗勢本窮蹙急思覓路逃竄又恐閩軍躡其後不能

免脫妄圖衝犯閩邊各壘蓋欲由間道以竄江西邊界也據康國器稟報長樂逆首林政揚已將僞來王陸瞬得擒獻到營輸誠自首卽日可期歲事廣東騰出龍長兵力自可速進鎮平西南以相犄角現在王德榜一軍由象洞前進高連陞黃少春康國器等軍距鎮平縣城均不過二三十里臣等本擬飭高連陞西出平遠會同

劉清亮盤龍岡之師遇賊奔衝昨據江西撫臣
劉坤一函稱現派席寶田等軍出平遠分駐大
柘東石會師進剿是鎮平西路亦有重兵與閩
粵聲勢皆可聯絡高連陞等軍卽可由鎮平北
路東路東南路併力偪攻免致顧此失彼臣等
惟當慎以圖之此次剿賊尤爲出力之總兵劉
端冕等謹先行開列仰懇

天恩分別獎勵

同日江西巡撫劉坤一奏言臣於八月十八日
馳抵江西省城因南路防務甚急當檄劉連捷
朱洪章移營南安並令朱南桂填紮吉安適接
婁雲慶席寶田稟報本月初九日該提督等以
兩營留守平遠親督八營進扼東石其餘八營
次日繼進是夜汪逆欲乘我立營未定傾巢而

出並令叛卒從茅寮坪鐵山障梅子畚數路來
攻席寶田當令各營嚴陣以待初十日賊果大
至衆約五六萬人席寶田令道員謝蘭階等迎
擊自率親兵督戰以總兵魏玉彩韓進春等分
扼左右兩路之賊中路各營如牆而進賊匪悉
衆來迎我軍環開槍礮斃賊甚多劉建業等先
率兩營陷陣謝蘭階等抄出陣後賊遂不支我

軍縱橫淹殺斃賊無算時右路之賊正與我軍相持見中路賊敗歸路已斷亦遂驚潰其田壘之賊數千人擒斬殆盡我軍萃於右路賊匪堅踞嶺上席寶田令謝蘭階等迎擊之賊且戰且退我軍追斬百餘名是日統計殺賊六七千名生擒二三千名其左路高嶺之賊被我軍擊敗後潛伏山谷是夜翻山欲竄茅寮坪與汪逆合

股席寶田派黃元果等馳往襲擊斃賊不少餘
黨數千人皆棄械就撫十一日僞東平王擁衆
繼至汪逆亦從茅寮坪率黨七八萬復來奪路
席寶田令魏玉彩等截擊僞東平王一股自督
各營迎剿汪逆大股賊分數路猛撲我軍槍礮
環施斃匪二千餘人賊猶拌死衝突劉建業躍
馬入陣斬黃衣賊目一名榮維善率隊繼進橫

截賊陣賊乃披靡汪逆憤甚欲督羣賊轉鬪我
軍乘勝驅逐賊遂敗潰翻山而走是日約斃賊
三四千人內有僞小王宗汪林僞天將胡春幅
郭安和僞朝將范秀魁及天安天燕等賊目十
餘名魏玉彩等復將僞東平王一股擊散招降
七八千人並有赴粵軍就撫者統計兩日共招
降一萬三四千人婁雲慶知賊爲席軍所挫折

竄大柘當飭總兵劉順隆馳往邀擊十二日行至良畬卽與賊遇劉順隆令洋礮隊直前擊之斃賊三千餘人婁雲慶恐賊由大柘出中坑以犯長甯之篁鄉堡卽於十三日飭劉順隆徑趨大柘自率各營由閒道馳赴中坑行至要馬炭適鳳祐兩酋胡瞎子李遠繼領羣賊擁至瞥見官軍登時驚走退至亂石徑地方我軍追至賊

衆擁擠落澗死者無數妻雲慶派隊由小路繞
出邀賊劉順隆由大柘會合閩粵之師追擊賊
腹背受敵分股向西南竄去我軍追至南極地
方又斃賊二千餘人生擒一百四十餘名訊據
賊供有汪逆因鎮平乏食欲乘江西防軍移動
意圖伺隙回竄之語今雖在東石大柘疊次大
挫然其人數尙多難免橫流旁溢現在席寶田

婁雲慶飛商駐防篁鄉堡鵝公墟各軍嚴爲之
備合力聚殲各等情臣尙恐賊繞出定南以及
南安當飭令席寶田婁雲慶確探賊蹤所向派
隊力追並取捷徑攔頭截擊如得劉連捷朱洪
章等速抵南安祥字營速抵定南可衛江西卽
可兼顧湖南臣復嚴檄南贛吉臨袁瑞各郡縣
實力防範使賊無隙可乘仍隨時察看情形儻

賊氛偏近江境臣卽親往督勦其力戰陣亡之
參將許貫元等相應請

旨飭部從優議卹均奏入

上命軍機大臣傳諭左宗棠瑞麟劉坤一徐宗幹郭
嵩燾曰汪逆盤踞鎮平疊經官軍勦敗圖由閩邊
竄犯江西經高連陞黃少春席寶田龔雲慶等分
路縱擊連獲大捷斬馘及招降者甚衆賊勢已蹙

惟人數尙多難免橫流旁溢之患左宗棠現飭高連陞等由鎮平北路東路東南路進逼而席寶田婁雲慶與駐防篁鄉堡等處之兵皆嚴爲之備著左宗棠劉坤一卽檄飭各軍實力進攻無任竄逸左宗棠當懷遵疊次諭旨迅赴粵境調度各軍以一事權劉坤一仍檄催劉連捷等速抵南安定南以固江省門戶一面嚴催席寶田婁雲慶會合閩

粵各軍協力圍剿投誠一股人數甚衆著妥爲安
插勿稍大意長樂逆首林政揚已將僞來王陸瞬
得擒獻到營輸誠粵東騰出龍長兵力自可速進
鎮平西南與各路援軍互爲犄角著瑞麟郭嵩燾
檄令卓興等移紮鎮平聽候左宗棠調遣以資得
力

上諭內閣曰左宗棠徐宗幹奏髮逆汪海洋伏匿鎮

平經高連陞等分路進擊統計斃悍賊三千餘名
康國器一軍由鎮平東南進攻斃賊甚多匪黨翻
山遁竄追至石古排賊壘僞天將張詳瞬等赴營
乞降此次尤爲出力之總兵劉端冕著賞換格洪
額巴圖魯名號副將馬駿發李大有均著賞加總
兵銜遊擊謝復雲著以參將留於福建補用並賞
加副將銜守備劉甫田著以都司留於福建補用

並賞換花翎其餘出力將弁等准左宗棠彙案保
奏本日復據劉坤一奏席寶田一軍由平遠進偪
鎮平殺賊六七千人生擒二三千人前後招降一
萬三四千人婁雲慶一軍在大柘地方擊勦竄賊
擒斬尤多援勦均屬得力卽著左宗棠劉坤一飭
令江西閩粵各軍乘此聲威掃穴擒渠盡殲醜類
陣亡參將許貴元都司楊興元守備劉得芳把總

張萬明均著交部從優議卹

十二日

甲戌

瑞麟郭嵩燾奏言林英彪縛獻來逆

出降後濠逆自知黨與日孤陸續分股移紮鎮平城外要口城內之匪日赴四鄉搶掠八月初二三四等日總兵方耀派都司方鼇等由熱水進擊斃匪百餘名將黃沙坑匪積米糧盡行焚燬該逆撤回賊卡退聚慈溪初五夜聞方耀令

遊擊方彩等由新鋪墟渡河直抵負墩賊營槍礮齊施逆衆驚惶失措方耀親督後隊馳入平毀逆營兩座斃賊二百餘名斬僞天將劉添保僞天燕張人桂二名餘匪遁走初九日派都司方豐等往攻慈溪該逆分三路來犯我軍分投迎勦鏖戰四時踏平慈溪賊巢逆匪敗退乘夜率馬隊數千突向新鋪一帶西竄方耀派各軍

飛追截擊並飭都司鄧安邦等速赴鎮平會同
閩軍收復縣城親督洋槍馬隊繞道兜剿逆黨
漸由慈溪南下我軍排槍轟擊梁國權等首先
陷陣斬首三十二級生擒一百二十三名該逆
疊次衝突不能越過遂折向長潭東石又經江
軍席寶田迎頭痛剿擒斬無數該逆復走石正
大柘及樓車等處經道員康國器提督高連陞

黃少春各督閩軍會同粵軍分路截擊查濂逆
汪海洋因守一隅久思他遁初猶冀花旗得逞
可以死灰復燃迨長樂收復彼已失其黨援方
耀扼守要衝遏其侵掠更形飢困加以高連陞
黃少春二軍進紮分水坳劉清亮一軍徑赴差
干王德榜與席寶田等軍先後馳抵平遠東石
各處官軍碁布星羅愈逼愈緊已成長圍之勢

惟是石正樓車地方四通八達與江西長甯接壤可抵連和亦可橫入江楚誠恐復被蔓延現在江閩粵三省官軍業經星馳追下臣等飛飭方耀鄭紹忠兩軍隨賊所向盡力窮追不得稍分畛域並飭李福泰移赴龍川居中調度任星元嚴守南雄卓興辦理惠屬餘匪兼顧南韶門戶奏入

上命軍機大臣傳諭左宗棠瑞麟劉坤一徐宗幹郭
嵩燾曰張逆困守鎮平經方耀等分路進攻立將
縣城收復逃賊被官軍沿途追殺精銳漸就散亡
正宜乘其潰散之際奮力痛剿將全股悉數殲滅
以除後患現在席寶田已向長潭東石迎頭擊賊
其石正大柘及樓車等處亦有康國器高連陞黃
少春等各督閩兵分路追截著左宗棠劉坤一嚴

飭各軍遇賊卽擊務須合力痛剿掃除淨盡不得
以賊勢已窮稍涉大意石正樓車地方與江西接
壤劉坤一仍當督飭江省各軍嚴密防範毋令逸
賊闖入江楚徐宗幹亦當飭閩邊防兵一體嚴備
以資堵遏粵省方耀鄭紹忠兩軍現已隨賊所向
盡力窮追李福泰移赴龍川相機剿辦任星元等
嚴守南雄等處布置尙屬周密著瑞麟郭嵩燾等

迅飭該員等乘勝追殺不准一名網漏

十五日_丑丁左宗棠徐宗幹奏言高連陞等於分

水塲擊賊獲勝後各軍分三路紮營進逼該逆

洵懼八月初七八等日康國器等督隊分攻石

古排對門營白果山各賊壘官軍行抵長旗嶺

逆首胡瞎子列隊九曲炭頂另有騎馬悍賊數

千飛奔而來康熊飛吳光亮督隊奮擊斃賊五

十餘名賊死拒不退林本等左右夾擊斃賊數
百名賊始潰走康熊飛等追抵賊壘濠邊槍礮
環攻逆首胡泳詳卽胡瞎子遞稟詐降康國器
飭各營乘夜急進直薄壘下守備李如奮勇先
登中槍陣亡康熊飛督各營繼進噴筒火箭迸
注賊壘頃刻煙燄飛騰官軍乘勢破柵而入立
將石古排賊壘焚燬各壘之賊亦同時驚潰康

國器令各營乘勝急攻鎮平縣城比抵城邊汪逆已率黨開西門逃竄是時高連陞黃少春等軍已將白泥湖賊壘掃蕩銜枚疾至各軍奪門而入搜斬逆賊千餘當於初十日將鎮平縣城克復官軍躡蹤追擊至城外河邊汪逆猶驅各賊於橋頭力堵高連陞等分路抄擊立斃賊目四名悍賊數十名賊大披靡爭搶過橋各軍乘

勢偏近陣斬悍賊千餘名擁擠落水死者二三千名該逆分路由梅子畚大寨東石等處向平遠而遁官軍復追斬無數十一日黃少春高連陞由閒道直趨東石鄉見逆賊萬餘向平遠而來黃少春等奮勇衝殺各營從左右抄出截賊數段賊衆翻山狂竄官軍四圍剿殺斃賊千餘另有賊股四千餘人爲官軍圍住伏地乞降黃

少春受之訊據賊供僞東平王何逆隻身逃走
餘黨已殲殺殆盡康國器所部追賊至竹子澳
賊方設伏圖陷官軍龔長春等鼓噪而進伏賊
齊起康熙飛忽從山前殺出林本等左右抄來
伏賊奪路分竄吳光亮從後截殺合力痛勦斃
賊一千餘名將沿途賊館二十餘處一律踏毀
十二日追至茅寮坪適先犯東石之賊經江軍

席寶田截擊大敗折回康熙飛等復揮軍截殺
斃賊甚多該逆急向大柘而竄官軍追至大柘
又斃賊七百餘名計克復鎮平沿途追剿前後
殺悍賊計萬餘名收降數千名現高連陞等軍
仍躡蹤緊追劉典所部亦由平遠出八尺攔截
查汪海洋負踞鎮平疊思由閩竄江迄不得逞
遂由平遠覓路而竄經各軍連日痛剿殲斃極

多兇鋒大挫據報賊蹤又改由石正龍虎墟一
帶分路竄走如江粵各軍能嚴扼其前閩軍復
緊躡其後此股可冀盡殲此次各軍克復鎮平
連日追勦勞瘁異常可否由臣等彙案保獎以
示激勵其力戰陣亡之擬保都司守備李如應
請

飭部照都司例從優議卹奏入

上命軍機大臣傳諭左宗棠瑞麟徐宗幹劉坤一郭
嵩燾曰汪逆負固鎮平經康國器高連陞等督軍
援剿連克堅壘直薄城下汪逆開西門逃竄復經
高連陞追剿斃賊甚多該逆現由石正龍虎墟一
帶分路竄走如江粵各軍嚴扼其前閩軍緊躡其
後自可漸就殄除著左宗棠卽飭入粵各軍跟蹤
追剿不可稍涉鬆勁劉坤一卽飭婁雲慶席寶田

等軍迎頭截擊勿任闖入江境如由廣東興甯和平竄至南雄終爲江西湖南邊患著瑞麟郭嵩燾督飭方耀等軍認真截剿如有趨南雄信息左宗棠卽飭劉典一軍由武平出江西安遠信豐急移南安兼顧湖南邊境該督撫等總宜通力合作將此股逆衆剿盡勿留遺孽此次出力各員弁著左宗棠等彙案擇尤保獎陣亡之守備李如著照都

司陣亡例從優議卹前因粵省賊勢漸衰已有旨
令鮑超募勇成軍後帶赴楚豫交界勦辦張總愚
股匪仍歸曾國藩節制婁雲慶軍本係鮑超舊部
仍准該提督酌量檄調著左宗棠傳知該員懍遵
前旨赴裕州泌陽地方勦賊如汪逆一股辦竣並
著飭令婁雲慶一軍亦赴南裕一帶交鮑超調遣
以資得力

左宗棠又奏言前經各軍稟報李侍賢自永定
敗潰後夜半偷渡隨行者溺斃數人復斃水土
岸割去鬚髮逃匿山中以其能操漳州土音遂
捏稱漳州難民人無知者夜行晝伏至六月二
十八日隻身逃至鎮平縣令民人送信汪逆率
黨郊迎並馬同入縣城因其舊黨百餘人泣訴
汪逆猜很之狀心不善之汪逆前曾藉詞不救

侍逆殺其舊黨李元茂等茲見李侍賢至亦不自安遂於七月初三日夜密遣賊黨四人乘李侍賢酣臥時殺之並殺其舊黨僞王宗僞天將僞朝將等五人傳示各賊館揚言侍逆已降官軍茲入鎮平復結黨圖爲內應也臣等猶恐所聞不確未敢遽以入奏茲鎮平克復後詢之降人難民所言皆同並見汪逆所貼僞示有侍逆

心懷險毒不得已而行此法等語則侍逆之輟
轉求生而卒遭汪逆毒手已屬無疑此賊與李
秀城同爲金陵巨逆屢經官軍痛剿將欲就擒
輒復逸去本年正月二十四日高連陞鎮門大
捷已獲其馬徧覓侍逆不得後乃知土民顏魁
以破舟載之回漳也此次敗後潛投汪逆而卒
爲汪逆所殺足見天網恢恢疏而不漏奏入報

聞